

యాకోబు రెగిడ్లి ఉత్త్రమ్ బారిక్ జలో యాకోబు రెగిడ్లి ఉత్త్రమ్

1 దేముడుచి, ప్రబు జలో యేసుక్రీస్తుచి సేవ కెర్తొ జోచొ *గొత్తి సుదొ జలో †యాకోబు, వేర వేర దేసిమ్లుతె చెతుర్పు జల ‡బార తెగల్చవ యూదుల్క, జొబర సంగ కెర రెగిడ్లి ఉత్త్రమ్.

అల్లర్ సేడ్డిన్చి రిసొ దయిరిమ్ కోడు

2 బావుడ్లు, తుమ్ వేర వేర అల్లర్ సేడ పరిచ్చ రితి జలె, 'చెంగిల్' మెన పూర్తి నర్ల తెన్ తా

3 కిచ్చొక మెలె, తుమ్చి నముకుమ్ అల్లర్లు వాట్ పరిచ్చ జలె, జీన్లె, తుమ్చి పెట్టి పూర్తి నిదానుమ్ జస్తె.

4 ప్రబుచి ఆత్మక తుమ్ పూర్తి జతి రితి, తప్పు నే జతి రితి, తుమ్చి ఆత్మతె కిచ్చొ చెంగిల్చి నే పిట్టి రితి, జేవేచి కామ్ పూర్తి జర్గు కెర్తి రితి తుమ్ నిదానుమ్ కెరన.

5 ఇన అల్లర్ పరిచ్చల్తె కిసి ఇండుక గే తుమ్తె కో జలెకు నేన్లెగిన, దేముడుక పున. కో పుసిలె, నే గోల కెర్తె, దర్ముమ్ తెన్ జో బుద్ది తయెదె.

6 గని ముక్కిమ్క ఎక్కి నముకుమ్ తెన్, కిచ్చొ అన్మానుమ్ నెంతె, పున. కిచ్చొక మెలె, కక్క అన్మానుమ్ తయెదె గే, గట్టిజ వాదు వీర్లె సముద్రుమ్చ కెర్లల్ కిసి ఇత్తల్ ఒత్తల్ లయెదె గే, జో మాన్సు దస్సి జయెదె.

* **1:1 1:1** నెంజలె 'గొతిమాన్సు' నెంజలె 'సేవ కెర్తొసొ'. † **1:1 1:1** ఈజో యాకోబు యేసుచొ బావొన్ జా తిలో, బెర్తె. మరియు చి యోసేపుచి పెట్టిచొ. యెరుసలేమ్చ నంవజలనచి సబక వెల్లొ తిలో. బారికుల్ 15:6-29, 21:18, గలతీ 1:19, 2:9, 12. ‡ **1:1 1:1** 'బార తెగల్' మెలె, ఒగ్గర్ పూర్ణమ్ తెంతొ, యాకోబుచ బార పుత్తర్లు తెంతొ యూదుల్తె బార తెగల్ అస్సి. ఎత్తి పుత్తున్ తెంతొ ఏక్ తెగ.

7 నిజమి, దసా మాన్సుక దొన్ని మెన్సుల్ తయెదె. కిచ్చొ కామ్తె కి జోక ఎక్కి నిదానుమ్ తయె నాయ్.

8 దసా మాన్సు, జలె, కీసి ప్రబుతె నజన్లె కి కిచ్చొ కి దొర్కు జయదె మెన ఉచరుక జయె నాయ్!

అల్లర్ సేడ్డిసి ఓర్పువ జతిన్చి కొడె

9 కీకేన్ జవున్ బావొ దాక్ జలె, బీద సుదొ జలె, దేముడు జోక గవురుమ్ రితి కెర అస్సె, జోక ఆత్మ సొమ్నారుమ్ కెర అస్సెచి రిసొ సర్ల జవున్.

10 దస్సి, సొమ్నారి జలొ బావొ కో జలెకు ప్రబుచి తెడి దాక్ జంక జలెకి, ఏక్ వేల బీద జంక జలెకి, జో కి జోచి పెట్టి సర్ల తియన్సు. కిచ్చొక మెలె, బయిలుచి చివ్వర్చ పుల్లో కీసి పొర్న జా సుకులగె, జో మాన్సుకి ఆకర్క మొరెదె.

11 బయిలుచి చివ్వర్ జలె, పొద్దు బార్ జా గట్టిజ వాదు ఒప్పడె కెర్లె, జేవ్చ పుల్లో సుకిల్ రితి పాడ్ కెర్తయ్. దస్సి సుకా గెచ్చు గెస్త గెతతి. జోవయించి నూటి గెతయ్. దస్సి, జోచ కమొ కెర్లె కెర్లె సొమ్నారి కి మొరెదె.

12 ప్రబుచి రిసొ కో నిదానుమ్ తెన్ కిచ్చొ కిచ్చొ అల్లర్ ఓర్పువ జవుల గే, జోక చెంగిలి. కిచ్చొక మెలె, పాపుమ్తె దెర్ను నే సేడ్డె జేవ్ అల్లర్ సేడ్డి పరిచ్చతె జిన్లె, దేముడు దెతి పరలోకుమ్తె జేవ్ గెతి కిరిటుమ్ జోక దొర్కు జయెదె. దేముడు ప్రమానుమ్ కెర్లె కోడు 'కో అంక ప్రేమ కెర్లె రితి ఇండుల గే, జోవయింకయ్ బెదవనిందె'.

13 గని అల్లర్ సేడ్డె పరిచ్చల్ జతె పొది, కో పాపుమ్ కెరుక ఉచర్లె జవున్, పాపుమ్ కెరుక దెర్లె జవున్, "దేముడు అంక పాపుమ్ కెరయ్తయ్" మెనున్ నాయ్. కిచ్చొక మెలె, దేముడు పాపుమ్తె బెదితోసొ నెంజె, పాపుమ్తె ఎధరె బెదె నాయ్, కో కి, కిచ్చొ కి జోక పాపుమ్ కెరవుక నెతిర్లి, చి 'పాపుమ్ కెర్పు' మెన కిచ్చొ రిసొ ఉచరె నాయ్, కేన్ పాపుమ్ కెరె నాయ్.

14 మాన్సుక పాపుమ్ సికయ్తిసి కిచ్చొ మెలె, జోచి సొంత *పెట్టిచ

గార్ ఆసలి జోక సికయ్తయ్, పెలయ్తయ్.

15 మాన్సుచి పెట్టి ఆస మొదోల్ జా జెర్మ, గజ్జల్ జా వడ్డ, పాపుమ్ వీరయితయ్. ఒత్త తెంతో, జా పాపుమ్ వడ్డ వడ్డ పూర్తి జా, మొర్ను వీరయితయ్.

చెంగిల్ తిలిసి ఎత్కి దేముడు తెంతో జెతిసి

16 నాయ్, బావుడ్లు, తుమ్ మోసిమ్ సేడ నాయ్.

17 చెంగిల్ తిలిస్ ఎత్కి, సత్తిమ్ తిలిస్ ఎత్కి పరలోకుమ్ తెంతో జెతయ్. ఉజిడ్ ఎత్కిక అబ్బోసి జలో దేముడు తెంతో జెతయ్. జో మార్పుప జతోసా నెంజె, జోచి ఉజిడి కెయ్యు నీడ జయె నాయ్.

18 జోచి సొంత ఇస్టుమ్క, జోచి సత్తిమ్ కోడుచి సెక్తికయ్ అమ్క జో జెర్మయ్లన్. కిచ్చొక మెలె, జో జెర్మయ్లన కెర్తన ఎత్కితె అమ్ జోక దిలి † నొవొ జతి రితి అమ్క నొవర్ జెర్మయ్లన్.

19 ప్రేమ తిల బావుడ్లు, ముక్కిమ్క తుమ్ కిచ్చొ దెరన మెలె, తుమ్తె ఎత్కి మాన్సు బుద్ది కొడొ సరిగా సూన్తన జా, బమ్మ తెన్ లట్టబ్బన నే జతె, బే బేగి కోపుమ్ జా నాయ్.

20 కిచ్చొక మెలె, మాన్సుచి కోపుమ్ దేముడుచి పున్నిమ్క వాట్ దెయె నాయ్, జోచ పున్నిమ్ కమొ జర్గు కెరె నాయ్.

21 జాకయ్, మర్కటుమ్ బుద్ది ఎత్కి, తుమ్చి పెట్టి గుడియయ్ జలి కుస్సిదుమ్ ఎత్కి తుమ్చి పెట్టి తెంతో వెంట గెల కెర, దాక్ కెరన, కోపుమ్ నే జతె, దేముడు తుమ్చి పెట్టి రోవిలి జోచి కోడు సేంతుమ్ తెన్ తుమ్ సూన సూన జాక పోసన. జా కోడు తుమ్చ ఆత్మల్క రచ్చించుప కెరుక తెరె.

22 గని దేముడుచి కోడు ఎత్కి సూన్తనయ్ తుమ్ జా నాయ్. ఎత్కి సూన్తనయ్ గని జోచి కోడు నే కెర్తన జలె, తుమ్ మోసిమ్ కెరన తస్తె. జోచి కోడ్ రితి ఇండ, చి తుమ్చి ఆత్మతె పలితుమ్ దెరెదె.

23 జోచి కోడు ఎత్కి సూనయ్ కో దస్సి ఇండె నాయ్ గే, కీసి జతయ్ మెలె, అద్దుమ్తె మాములుమ్ మొకొమ్ దెకన్తోసాచి రితి జతయ్.

† 1:18 1:18 సంక్యా 15:19-21, ద్వితీ 18:3-4, రోమి 11:16.

24 జో మాన్సు అద్దుమ్తె దెకన పన్ల ఉట్ట గెచ్చు, కీసి డీసిలో గే బేగి పచ్చు గెల్తయ్.

25 గని, ఎత్కిక ‡ఆదారుమ్ తిలి ఆగ్గు కో చెంగిల్ అద్దుమ్ కెరన పోసన జా ఆగ్గుచి ఉప్పిరి నిదానుమ్ జయెదె గే, జోచి రితి నూన పవ్సితోసా నే జతె, జా ఆగ్గు కెర్తోసాయి జయెదె, చి జా ఆగ్గు రితి జో ఇండితిసి పాపల్, తప్పుల్, ఇండితిన్ తెంతో జో మాన్సుక విడ్డల్ కెరెదె, చి జా ఆగ్గు రితి ఇండితిన్తె జోక చెంగిల్ జయెదె, ఆత్మపలితుమ్ దెరెదె.

దేముడుచి నిజుమ్చి బక్తి

26 “దేముడుచి బక్తి ఆవ్ కెర్తసి” మెన కో ఉచరంతయ్ గే, జోచి చోండి తెన్ ఇస్టుమ్ అయ్లి రితి లట్టబ్తయ్ గే, జోవయించి పెట్టి జోక జొయ్యి మోసిమ్ కెరంతయ్. జోవయించి బక్తి ఆరి జతయ్.

27 అమ్క అబ్బొ జలో దేముడుచి మొక్కె మాన్సు కెర్తి కిచ్చొ బక్తి సత్తిమ్చి నిజుమ్చి జయెదె మెలె, అమ్ జోచి సేవ కెర్తినక ‘సత్తిమ్చి నిజుమ్చి’ మెన కీస కమొ రుజ్జు దెకవుల మెలె, పోర బోదల్చ, రండెల్ మాన్సుల్చ బాదల్ దెక అమ్ తోడ్ కెర్తసి, పడ్డొ ఈంజ లోకుమ్చ పాపుమ్ కమొతె అమ్ నే బెదితె ఆత్మ నుద్ది తతిసి.

2

సామ్పార్లక బీద నుదల్క తేడల్ నే దెకుత్

1 బావుడ్లు, పరలోకుమ్చి ఉజిడి తిలో అమ్చొ ప్రబు జలో యేసుక్రీస్తుక తుమ్ నంపజలి రిసా, తిలసక నెంజిలసక తేడల్ దెక నాయ్.

2 మెలె, దొగుల సబతె అయ్లె, ఎక్కిలో జలె, బజర్చ ముద్దివొ ఉంగారల్ తియన చెంగిల్ పాలల్ గలన అయ్లె, గని అన్నెక్కో బీద తా పోర్ను పాలల్ గలన తా జో కి అయ్లె,

‡ 1:25 1:25 2:18 దెక.

3 చెంగిల పాలల్ తిలోసాక తుమ్ చెంగిల్ దెక, “ఈందె, ఇన్నె చెంగిల్తె వెసు” మెన పురై బుకార్లై, గని బీద సుదొక “ఒత్త టీవ” జవున్, “అంచి చట్టె వెసు” మెన జవున్ సంగిలె,

4 తుమ్ దొన్ని మెన్సుల్ జా తప్పుచ తీర్పుల్ కెర్తన జా తస్తె.

5 తుమ్ నూన, ప్రేమ తిల బావుడ్లు. ఈంజ లోకుమ్చి దనుమ్క దెకిలె, ఒగ్గర్జిన్ బీద సుదల్ అస్తి. జలె, *జోవయింతె ఒగ్గర్జిన్క దేముడు నిసాన, జోచి నముకుమ్ జతు మెనయ్, జోక ప్రేమ కెర్తనక జో దెతి వాటతె బెదుత్ మెనయ్, మెలె, పరలోకుమ్తె బెదుత్ మెనయ్.

6 తూమ్, బీద సుదల్క నిస్కారుమ్ దెక అస్సున్. తుమ్క కో నస్టల్చ మోసిమ్లు కెర్తతి గే తుమ్ ఉచర. బీద సుదల్ నాయ్, గని సొమ్మార్లుయి దస్సి కెర్తతి. జెవ్వి తుమ్క తీర్పు కెర్తి గెరితె పెలన తగుల్ కెర్తతి.

7 పడ్డొ, తుమ్ క్రీస్తుక నంప కెర్తికయ్, జోచి నావ్ తెన్ బాప్తిసుమ్ నజున్దు, గెద. జలె, జోచి నావ్, గవురుమ్చి నావ్, కో దూసుప కెర్తతి మెలె, బీద సుదల్ నాయ్, గని సొమ్మార్లుయి.

8 దేముడుచి కొడొతె రెగిడ్డి రితి,

† “తుమ్క తూమ్ కెర్తి ప్రేమ కెరంతసు గే,

తుచి పాసిచొ మాన్సుక కి తెద్ది ప్రేమ కెర్తె తా”

మెన పరలోకుమ్చొ రానొ జలొ దేముడు దిలి ముక్కిమ్చి ఆగ్గు తుమ్ ఇండితిన్తె నెరవెర్పుప కెర్తె, తుమ్క చెంగిలి.

9 గని, జా ఆగ్గు నెరవెర్పుప నే కెర్తి రితి తుమ్ తేడల్ దెకిలె, పాపుమ్ ఇండితను, చి ఆగ్గుల్చి మొక్కె పాపుమ్ సుదల్చి సిచ్చక విలువ జా అస్సున్.

* 2:5 2:5 కొరిందిల్క రెగిడ్డి 2 నంబర్ ఉత్తమ 1:27-29. † 2:8 2:8 లేవీయకాండుమ్ 19:18 మత్తయి 22:39, చి యోహాను 13:34 దెక.

10 కిచ్చొక మెలె, ఆగ్నల్ ఎత్కి నిదానుమ్ కో కెరై, గని మొత్తుమ్తె ఎత్కి జవున్ పిట్టయ్లె, మొత్తుమి పిట్టయ్లొసొ జతయ్, చి మొత్తుమ్చి సిచ్చక జో మాన్సు విలువ జా అస్సె.

11 కిచ్చొక మెలె,

‡“లంజెకమొ కెర నాయ్”

మెన సంగిలొసొ,

§“నరు అత్య కెర నాయ్”

మెన సంగిలొసొ ఎత్కిలొయి. జలె, తుమ్ లంజెకమొ నే కెరై కి నరు అత్య కెరైగిన, జో దేముడు దిల ఆగ్నల్ మొత్తుమ్చి మొక్క పాపుమ్ కెరైస జా అస్సున్.

12 జలె, అమ్చ పాపుమ్చ ఆసల్, తప్పుల్ తెంతో అమ్క విడ్డల్ కెరై *మాన్సుల్క ప్రేమ కెరై కన్కారుమ్ దెకితి ఆగ్నక దెకయ్ దేముడు తుమ్క తీర్పు కెరైదె. అమ్క ‘జయ్యి ఆగ్న రితి ఇండిల గే నాయ్ గే’ మెన జో తీర్పు కెరైదె. జయి కోడు నే పచ్చితె తుమ్ లట్టబా, ఇండ.

13 కిచ్చొక మెలె, కో అన్నె మాన్సుల్క కన్కారుమ్ దెకె నాయ్ గే, దేముడు జోకయ్ తీర్పు కెరైన్తె జోకయ్ కన్కారుమ్ దెకుక బెదె నాయ్. గని, కో అన్నె మాన్సుల్క కన్కారుమ్ దెకితయ్ గే, జోక తీర్పు కెరై పొదిక జో ప్రబు జోకయ్ కన్కారుమ్ దెకెదె.

14 బావుడ్లు, “ప్రబుక నంప కెరైసి” మెన ఎత్కిలొ సంగిలే కి, జో బుల్లి బుద్ది దస్సి నముకుమ్ తెన్ నే బెదిలె, కిచ్చొయ్ లాబుమ్! ‘నముకుమ్’ మెన జో మాన్సు రితి సంగితిసి జోక రచ్చొంచుప కెరుక తెరె గే? తుమ్ ఉచర.

15 నంపజలొన్తె కేన్ జవున్ బావొక గే, బేనిక గే, సరిపుచుప జత పాలల్ నెంజిలె జవున్, సరిపుచుప జతి రొజుకచి అన్నిమ్ దొర్కు కెరంతి సెక్కి జవున్ నెంజిలె,

‡ 2:11 2:11 నిర్గమకాండుమ్ 20:14, ద్వితీయోపదేశ కాండుము 5:18. § 2:11

2:11 నిర్గమకాండుమ్ 20:13, ద్వితీయోపదేశ కాండుము 5:17. * 2:12 2:12 1:25, చి 2:8 అన్నె దెక.

16 కో జలెకు జోక “చెంగిల్ తా. తుమ్క పాలల్ చి అన్నిమ్ దొర్పు జవున్” మెన సంగిలె, గని సరి జతి తోడు నే దిలె, కిచ్చొ లాబుమ్! కామ్క నెంజె.

17 దస్సి, రితి నముకుమ్ సంగన్లె, గని కామ్క జెతికయ్ కామ్ నే కెర్లె, జా నముకుమ్ ఆరిచి.

18 “తుకయ్ నముకుమ్, గని అంకయ్ కమె” మెన కో జలెకు అన్నెక్లొక సంగిలె, జో అన్నెక్లొక ఆవ్ కిచ్చొ జబాబ్ దెయిందె మెలె, “తుచ కమె నెంతె తుచి నముకుమ్ అంక రుజ్జు జయె నాయ్. కేన్ జవున్ కామ్ కెర్లెకయ్ నముకుమ్ చినుక జయెదె. ఆవ్, జలె, అంచ కమెకయ్ అంచి నముకుమ్ దెకయిందె” మెనయ్ జబాబ్ దెయిందె.

19 † “ఎక్కిలో దేముడు ఎక్కిలోయి అస్సె” మెన తుమ్ నంప కెర్తసు. జా సరిగా, గని దస్సి మెన బూతల్ కి ఒప్పన్తతి. గని ఒప్పన జేవ్ జంక బియఁ అద్దుర్ జా గెతతి.

20 చెంగిలి నే ఉచర్తో ఓ మాన్సు, తుయి కో జలెకు, కమెతె నే రుజ్జు జతి నముకుమ్క ‘ఆరిచి’ మెన, ఆవ్ తుక రుజ్జు దెకవుక తుక కావలె గే?

21 జలె, ‡ “ ‘బలి’ మెన పుత్తుద్క కండ దె” మెన దేముడు సంగిలి రితి పుత్తున్ జలొ ఇస్సాకుక అబ్రాహామ్ బలి దెతి టాన్తె బంద తెయార్ కెర్లిన్ తెన్, జో కెర్లి జా కామ్చి రిసాయి, “నిజుమి అన్నె పూర్తి నంప కెర్తయ్, సత్తిమ్ తెన్ అస్సె” మెన, దేముడు ‘జోక పున్నిమ్’ మెలి రితి అబ్రాహామ్క తీర్పు దెకె నాయ్ గే?

22 మెలె, జో అబ్రాహామ్చ కమెతె జోచి నముకుమ్ బెద కామ్ కెర్లె తిలి, చి జోవయించ కమెతె జోచి నముకుమ్ బార్ జా నెరవెర్సుప జలి.

23 దస్సి, జా కామ్తె జోచి నముకుమ్ రుజ్జు జలి రిసా,
§ “అబ్రాహామ్ దేముడు సంగిలి కోడు నంప కెర్లి రిసాయి ‘జోక పున్నిమ్’ మెలి రితి ప్రబు దెకిలన్”

† 2:19 2:19 గలతియల్ 3:20, రోమియల్ 3:30, మార్కు 12:29. ‡ 2:21 2:21

ఆదికాండుమ్ 22:1-18. § 2:23 2:23 ఆదికాండుమ్ 15:6, రోమియల్ 4:3, 5, 9.

మెన రెగిడ్లిన్ క 'నిజుమ్' జతయ్. * 'దేముడుచొ మింతున్' మెన కి అబ్రాహామ్ చి రిసా దేముడుచి కొడతె రెగ్డ అస్సె.

24 దస్సి, ఎక్కి సంగన్లి నముకుమ్ చి రిసా నాయ్, గని జా నముకుమ్ జోచి కమెతె బార్ జా రుజ్జు జలి రిసాయి, దసా మాన్సుక 'సత్తిమ్ చొ. పున్నిమ్ చొ' మెలి రితి దేముడు దెకితయ్.

25 అగ్గె లంజె జియ తిలి రాహాబు తెన్ కి దస్సి. జేవ్ చి † ఏక్ కామ్ చి రిసా, మెలె, జా నుట్టు కబుర్ అయ్ ల పూర్గుల్ క జా మరియాద కెర, జోచ విరోదుమ్ సుదల్ తె జేవ్ దెర్ను నే సెడ్డి రితి లుంకడ, వేర వాట్ తెర్వ దిలి రిసా, 'జాక పున్నిమ్' మెలి రితి దేముడు దెకిలన్.

26 జలె, జివ్ నెంజెలె ఆగ్ కిసి మొర తయెదె గే, దస్సి, మాన్సు ఇండిత కమెతె నే బార్ జలె, జో సంగితి నముకుమ్ కామ్ క నెంజె, మొర అస్సె.

3

కొడొ లట్టబ్లిన్ తె జాగర్త దెకనుక

1 బావుడ్లు, తుమ్ తె ఒగ్గర్ జిన్ బోదన కెర్తన జతు నాయ్. కిచ్చొక మెలె, అమ్ బోదన కెర్తన చి పూచి ఒగ్గరి, చి ఆకర్ దీనల్ క ప్రబు అమ్ క పరిచ్చ కెర తీర్పు కెర్తి పొదిక, అమ్ క జో తియార్లి జా కామ్ చి రిసా ముక్కిమ్ క అమ్ కయ్ తీర్పు కెరెదె.

2 అమ్ తె కో కి తప్పుల్ సంగుక జయెదె, చి కొడొ లట్టబ్లిన్ తె కో కిచ్చొ తప్పుల్ నే సంగుక తెర్లె, జో మాన్సుక 'జోచి ఆగుచి ఉప్పిరి జో పూర్తి ఏలుప కెర్తయ్, జో మాన్సు తె కిచ్చొయ్ పొరపాట్ నాయ్' మెనుక జతయ్.

3 జేవ్ కేన్ దిక్కు ఇండుక అమ్ చి ఇస్టుమ్ తయెదె గే, ఒత్తయ్ ఇండుత్ మెన, గోడల్ చ చోడిలె కలెమ్ చప్లయ్ లె జోచి ఒండి ఆగుక బులవుక జయెదె.

* 2:23 2:23 2 దిన: 20:7. † 2:25 2:25 యెహోసువ 2:1-24, 6:1-25.

4 ఓడల్ తెన్ కి దస్సి. ఓడ వెల్లి జలెకి, దిక్కు దెకయ్తి జాచి చట్టు జాచి కంట ఇదిలిసి జయెదె. జలె, జా ఓడక గట్టిజ వాదు పెలిలెకి, ఓడచి కంటొ దిక్కు దెకయ్తి జా చట్టు ఇదిలిసి జలెకి, ఇండయ్తొసా జా చట్టు బుడ్డవ కేన్ పక్క దెకయెదె గే, జయ్యి పక్క ఓడ గెచ్చెదె.

5 దస్సి, ఒండి ఆగుక జీబు ఇదిలిసి జలెకి, లట్టబ్లె జాక కెద్ది సెక్తి! అన్నె, కెద్ది డొంగుర్చ రూకుల్క ఏక్ ఇదిలిసి ఆగి డయ గెలెదె!

6 దస్సి, జీబు ఆగిచి రితి జయెదె. అమ్చి ఒండి ఆగుతె జీబు కెద్ది పాపుమ్ కెరయెదె! అమ్చి ఒండి ఆగుక గార్ కెరెదె. అమ్ జెర్మిల్ తెంతొ మొరై ఎదక ఈంజ లోకుమ్తెచి అమ్చి బత్తుతె జర్లు జతిసి ఎత్తిక జీబు ఏలుప కెర్తయ్. మాన్సు జాగర్త నెంజిలె, అమ్చి చొండితె వెల్లి ఆగి సేడ్లి రితి జయెదె.

7 మెలె, ఎత్తి రగుమ్ జంతువుల్క, పిట్టల్క, అయివొ గట్టక, మొన్సు గట్టక మాన్సు ముద్దొ కెరుక జయెదె. జేవ్క మాన్సుల్ ముద్దొ కెర అస్తి, గని

8 జీబుక కేన్ మాన్సు ముద్దొ కెరుక నెత్తిర్తి. జీబు తుక్లె తంక నెత్త, ఒగ్గర్ ప్రమాదుమ్ దెకయ్తయ్, జాచితె మొర్తి విస్సుమ్ బెర్తు తయెదె.

9 జీబు తెన్ అబ్బొ జలొ దేముడు ప్రబుక గవురుమ్ సంగితనుమ్, గని మాన్సుల్క దూసుప కెర్తనుమ్, జోచి పొలిక జేవ్ జెర్మున్ జలెకి. దస్సి, కెద్ది తప్పు కెర్తనుమ్!

10 ఎక్కి చొండి తెంతొ గవురుమ్ సంగితిసి, దూసుప కెర్తిసి బార్ జతయ్. బావుడ్లు, ఈంజ తప్పు. ఇసిచి పొస.

11 ఎక్కి గొయి తెంతొ ఊంట పుట్లె, చెంగిలొ పానిచి కారు జలి గర్చి పాని దెయెదె గే? నాయ్ గెద.

12 పడ్డొ, బావుడ్లు, * అంజూరుమ్ రూక్తె ఒలివ పండ్లు దెరుల గె? నెంజిలె, ద్రాచ చెట్లె బొడ్డ పండ్లు దెరుల గే? నాయ్, గెద. దస్సి, కారు జలి పానిచి ఊంట చెంగిలొ పాని దెయె నాయ్.

పరలోకుమ్ తెంతొ చి గ్యానుమ్ కిసి తయెదె

* 3:12 3:12 అంజూరుమ్ రూకు బొడ్డ రూకు రితి తయెదె.

13 తుమ్తె కక్కయ్ బుద్ది గ్యానుమ్? 'అంకయ్ గ్యానుమ్' మెన కో ఉచరన్లె, జా గ్యానుమ్తె బెదితి బుద్ది తెన్, గవురుమ్ నే ఉచరంతె, జా గ్యానుమ్తె బెదిత కమొ ఇండ రుజ్జు దెకవును.

14 గని తుమ్చి పెట్టి గోసచి విస్సుమ్ తిలె, సొంత గవురుమ్ ఆనన్తి ఆస తిలె, 'ఆమ్ సత్తిమ్చ' మెన తుమ్ ఉచరన నాయ్, అబద్దుమ్ జస్తె.

15 తుమ్చి పెట్టి దస్సు బుద్దుల్ తిలె, తుమ్చి గ్యానుమ్ కేనె తెంతొ జెతయ్ మెలె, పరలోకుమ్ తెంతొ నాయ్, గని ఈంజయ్ లోకుమ్చి తెంతొయ్, మాములుమ్ †ఆగ్ రగుమ్, బూతల్ తెంతొ చి రగుమ్ జతయ్.

16 గోసలు, సొంత గవురుమ్ ఆనన్త ఆసల్ కేనె తవుల గే, ఒత్తయ్ కిచ్చొ ముద్దొ తయె నాయ్, గొడ్డుల్ తయెదె, చి మాన్సుల్ ఎత్తి పాపుమ్ ఇండుక అలవాట్ జవుల.

17 గని పరలోకుమ్ తెంతొ అయ్లి గ్యానుమ్, ప్రబుచి సుద్ది తెన్, సేంతుమ్ బుద్ది తెన్, మెత్తన బుద్ది తెన్, సొంత ఇస్టుమ్ జర్గు కెరుక ఒగ్గర్ నే తతె, వేర మాన్సుల్చి కోడు మరియాద తెన్ సూన్తి బుద్ది తెన్ తా, కిచ్చొయ్ ఉప్రమెస్సు నెంతె తయెదె.

18 అన్నె, పున్నిమ్ కేనె పలితుమ్ దెరెదె మెలె, సేంతుమ్ కెరయ్త మాన్సుల్చి అత్తి సేంతుమ్చి బీ గలిలిన్తెయ్ పలితుమ్ దెరెదె.

4

దేముడు సంగిలి రితి ఇండుక

1 తుమ్చితె తగుల్ జతిసి, జట్టి జతిసి కేనె తెంతొ జెతయ్ గే తుమ్ ఉచర. కేనె తెంతొ మెలె, తుమ్చి ఆగుతె జట్టి జత ఆసల్ తెంతొయ్.

2 కిచ్చొ జలెకి ఆస జతసు, చి జా దొర్కు నే జలె, అన్నెక్కోక మార్తసు. దస గోసల్ తెన్ తత్తసు, గని తుమ్ ఆస జలిసి దొర్కు నెంజె, చి గొడ్డుల్ తగుల్ జతె తత్తసు. కిచ్చొక తుమ్క దొర్కు జలిసి దొర్కు నెంజె మెలె, దేముడుక పుసున్ నాయ్.

† 3:15 3:15 1:14 దెక.

3 నెంజిలె, పుసిలెకి, దొర్కు నెంజె. కిచ్చొక మెలె, గర్చి బుద్ది తెన్ పుసితను. మెలె, తుమ్చి పెట్టిచ ఆసల్ జర్గు కెరన్కయ్ ఉచర పుసితను.

4 కేన్ జవున్ తేర్బోద మున్నున్క ముల దా లంజె జలి రితి, తుమ్ దేముడుక ముల, ఈంజయ్ లోకుమ్చి బుద్దితె గెచ్చ అస్సున్! ఈంజయ్ లోకుమ్చి దనుమ్క ఆస జతిసి దేముడుక విరోదుమ్ జతయ్ మెన నేస్సు గే? జాకయ్, ఈంజయ్ లోకుమ్చి పచ్చెన కో గెతయ్ గే, దేముడుక విరోదుమ్ నుదొ జతయ్.

5*“అమ్ మాన్సుల్చి పెట్టి జో దిలి ఆత్మ జోకయ్

నిదానుమ్ తవున్ మెన జోచి ఆస”

మెన అగ్గె తెంతో దేముడుచి కొడొతె రెగ్గ అస్సె. జా కోడు ఆరి ఒత్త అస్సె మెన ఉచర్తను గే?

6 అన్నె, అమ్ వేర ఆసల్ నే జతి రితి ప్రబు అమ్క దయ కెర దొర్కు. జలి తోడు తయెదె. జాకయ్, దేముడుచి కొడొతె అన్నె కిచ్చొ రెగ్గ అస్సె మెలె,

†“గవురుమ్ ఉచరంతసక దేముడు

దూరి కెర్తయ్,

గని కో దాక్ కెరనుల గే,

జోవయింకయ్ జోచి దయచి తోడు దెయెదె”

మెన రెగ్గ అస్సె.

7 జాకయ్, దేముడుచి తెడి జా, దాక్ కెరన జోవయించి ఇస్టుమ్ రితి ఇండుక తుమ్ కోర్ప జా. దస్సి జలదు మెలె, సయ్తాన్ పాసి అయ్లి రితి జా జోచి బుద్ది సికడుక జవున్ కిచ్చొ వేర అల్లర్ కెరుక జవున్ ఉచర్లె, జోక “ఉట్ట గో!” మెలె, జో ఉట్ట నిగెదె.

8 దేముడుక పాసి జా, చి జో తుమ్కయ్ పాసి జెయెదె. తుమ్ పాపుమ్ కెర్లస తుమ్చి ఆత్మచ అత్తో సుద్ది కెరన. తుమ్ దొన్ని మెన్సుల్ తిలస, తుమ్చి పెట్టి ఎక్కి ప్రబుచయ్ జా జోచి సుద్ది జా, జోక ఎక్కి నిదానుమ్ జా.

* 4:5 4:5 నిర్గమకాండుమ్ 20:5-6. † 4:6 4:6 సామెతల్ 3:34.

9 తుమ్చ కమొచి పాపుమ్ ఉచరన పెట్టి బాద సేడ, లాజ్ జా దుకుమ్ జా ఏడ, దన కమొ ముల. పాపుమ్ కమొచి ఆనుక ముల్తి బుద్ది జా తుమ్ ఏడ. పాపుమ్ కమొచి నర్ల ముల్తి బుద్ది జా తుమ్ దుకుమ్ జా.

10 దేముడుచి మొక్కె దాక్ కెరన, చి జో తుమ్క టీచడెదె.‡

మాన్సుల్క తీర్పు నే కెరుక

11 బావుడ్లు, ఎక్కిలోచి రిసా అన్నెక్లొ దూసుప కెర్త తీర్పు కొడొ లట్టబా నాయ్. అన్నెక్లొచి రిసా దూసుప కెర్త తీర్పు కొడొ కో లట్టబుల గే, దేముడు దిలి సీఆగ్గుక కి దూసుప కెర తీర్పు కెర్తయ్. దేముడుచి ఆగ్గుచి ఉప్పిరి తుమ్ తీర్పు కెర్తసు జలె, జోచి ఆగ్గు రితి ఇండుస్ నాయ్, గని జోచి ఆగ్గుచి కంట వెల్లో కెరనుక ఉచర్లి రితి జతసు.

12 *మోసే పూర్గుమ్చొచి అత్తి ఆగ్గుల్ దెటొసా తీర్పు కెర్టొసా ఎక్కిలోయి. అన్నె కోయి నాయ్. రచ్చించుప కెరుక నాసెనుమ్ కెరుక అదికారుమ్ తిలోసా. ఎక్కిలోక అన్నెక్లొ తీర్పు కెరుక తూమ్ కొన్సు!

అమ్చి బత్తు దేముడుచి అత్తి అస్సె

13 అల్లె, “అజి గే కలిక గే పలాన్ పట్టుమ్తె గెచ్చ వెర్నెక్క రోజుక బియ్యార్ కెర కెర లాబుమ్ కెరనుమ్దె” మెన జవున్ తుమ్ దయిరిమ్ ఉచర్తస జాగర్త ఉచర.

14 కలిక కిచ్చొ జర్గు జయెదె గే నేన్సు. తుమ్చి బత్తు కిసిచి? తుమ్ కిసి జస్తె మెలె, గాండుచి రితి జా, కెయ గే డీస, గడియయ్ తా, అన్నె డీసున్ నాయ్.

‡ 4:10 4:10 పేతురు రెగిడ్లి ఏక్ నంబర్ ఉత్తమ్ 5:5-10. § 4:11 4:11 ముక్కిమ్ జలి ఆగ్గు జలె, ఎత్తి అదికారుమ్ తిలో దేముడుక చి అన్నె మాన్సుల్క ప్రేమయ్ కెర్సి. మత్తయి 22:37-40, మార్కు 12:30, 31, 33 చి లూకా10:27. యాకోబు 2:8 కి దెక.

* 4:12 4:12 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రర్దయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచే వుస్తకుమ్తె రెర్దయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగిడ్లి దేముడుచ ఆగ్గుల్ మెన రర్దవ అస్సె.

15 నాయ్, సొంత సెక్తిక దస్సి దయిరిమ్ నే జతె, తుమ్ కిచ్చొ ఉచరుక చెంగిల్ మెలె, “ప్రబు సెలవ్ దిలె జిమ్దె, చి ఈంజ జా కామ్ కెరుమ్దే” మెన.

16 అప్పె తుమ్ కిసి జతసు మెలె, తుమ్చి సొంత సెక్తిక నంపజా, దయిరిమ్ గవురుమ్ ఉచరంతసు. దస్సి సొంత సెక్తిక దయిరిమ్ గవురుమ్ ఉచరంతిసి తప్పు.

17 జలె, కిచ్చొ కెర్లె కిసి ఇండిలె చెంగిల్ గే కో జాన జానయ్ దస్సి నే కెర్లె నే ఇండిలె, జో మాన్సుక జా తప్పు పాపుమ్ జతయ్.

5

మాన్సులక మోసిమ్ కెర్లెన్చి రిసా తీర్పు

1 అల్లె, తుమ్ సొమ్మార్లు కో జలెకు, పాసి జెత తుమ్క లాయిత కన్టల్చి రిసా తుమ్ ఏడుక దెర.

2 తుమ్చి సొమ్మారుమ్ కువ గెచ్చు అస్సె, తుమ్చ పాలల్క నుస్సి కా గెల అస్సె,

3 తుమ్చి బజార్ సామన్, వెండి సామన్క చెద్ద కా గెల అస్సె. తూమ్ కి పాడ్ జతినక ఈంజ సామన్ ఎత్తి కువిలిసి చెద్ద కా గెలిసి రుజ్జు జయెదె. కిచ్చొ రుజ్జు మెలె, ఈంజ నాసెనుమ్ ఆగి డడ్డిల్ రితి తుమ్చి ఆగ్క కి కా గెలెదె. దస్సి, ఆకర్ దీనల్చి రిసా ఈంజ సిచ్చ సంపాదన కెరన అస్సున్. ఆకర్క దస్సి సిచ్చ జస్సె.

4 ఆదె, తుమ్చి బుయిచి పంటో లాయిల కూలి మాన్సుల్చి కూలి డబ్బుల్ తుమ్ మోసిమ్ కెర తియన్లదు. జా కూలి డబ్బుల్ కేక్ గల తుమ్క నింద సంగితయ్. జా పంటో లాయిలనచి ఏడుక ఎత్తిక ఏలుప కెర్లె పరలోకుమ్చొ ప్రబు నూన అస్సె.

5 ఈంజయ్ లోకుమ్తె సుక్కుమ్ తెన్ తుమ్చి పెట్టి ఇస్టుమ్ అయ్లి రితి జియ అస్సున్. ‘కండుక’ మెన తుమ్ బెయిలల్ గొరెల్ గట్టక కిసి బలుమ్ కెర్లెసు గే, దస్సి, మొర్తి సిచ్చ కతి రిసా తుమ్క తుమి బలుమ్ కెరన అస్సున్!

6 పాపుమ్, సత్తిమ్చ మాన్సుల్క నిందల్ కెర మార అస్సున్. తుమ్క జేవ్ జబాబ్ నే దెతె తుక్లె అస్తి.

యేసు అన్నె జెతె ఎదక నిదానుమ్ తెన్ రకుక

7 జలె, బావుడ్లు, ప్రబు అన్నె జెతె ఎదక తుమ్ నిదానుమ్ తా రక. ఈందె, రయ్తు బి గల తిలె, తొలి పాని ఆకర్ పాని పెట పంటొ పికిత్ ఎదక, ఈంజ లోకుమ్చి జా విలువచి పంటొ లాయితి సమయుమ్ జెతె ఎదక బమ్మ నెంతె, జో రయ్తు రకెదె.

8 తూమ్ కి దస్సి నిదానుమ్ తెన్ రక. నిజుమి, తుమ్చి ఆత్మతె డిట్టుమ్ జా. కిచ్చొక మెలె, ప్రబు అన్నె జెతికయ్ సమయుమ్ పాసి జా అస్సె.

9 ఎక్కిలోచి రిసా అన్నెక్కో నిందల్ ఉచర నాయ్, చి ప్రబు తుమ్కయ్ నిందల్ కెరుక తయె నాయ్. ఓదె, ఈంజ లోకుమ్చి గుమ్ముమ్ ఒత్తల్తో మెలి రితి తీర్పు కెర్తొసా జతో జో ప్రబు టీవ, మాన్సుల్క పరిచ్చు కెర తీర్పు కెరుక మెనయ్ రకితయ్.

10 బావుడ్లు, బాదల్ ఓర్పువ జతిన్చి నిదానుమ్చి రిసా తుమ్క రుజ్జు తంక మెలె, దేముడు ప్రబుచి నావ్ తెన్ జోచ కబుర్లు సూనయ్ల పూర్గుల్చి రిసా తుమ్ ఉచర. జోవయించి నిదానుమ్ దెక, తూమ్ కి దస్సి నిదానుమ్ జా.

11 ఈందె, జోవయింతె కో నిదానుమ్ తా గెల గే, 'జోవయింకయ్ చెంగిలి' మెన సంగితసుమ్. *యోబు పూర్గుమ్చొ ఒగ్గర్ ఒగ్గర్ అల్లర్ సేడ్లె కి, జో నిదానుమ్ తా గెలిన్చి రిసా సూన అస్సున్. జో యోబు నిదానుమ్ తతికయ్, దేముడు జర్గు కెర్లిసి, కన్కారుమ్ దెకిలిసి, రచ్చించుప కెర్లిన్చి రిసా సూన అస్సున్, గెద. దస్సి, తూమ్ కి దేముడుచి దయ దెక అస్సున్.

ఒట్టు నే గలనుక

12 ముక్కిమ్క, బావొ, పరలోకుమ్చి సాచి జవున్, బుయిచి సాచి జవున్, కిచ్చొచి సాచి జలెకి ఒట్టు గలన నాయ్. 'నాయ్' మెనుక జలె,

* 5:11 5:11 యోబు పుస్తకమ్ దెక.

‘నాయ్’ మెన. ‘ఎఁ ఎఁ’ మెనుక జలె, ‘ఎఁ ఎఁ’ మెన. దస్సి, ఒట్టు నే గలంతె రితి సత్తిమి సంగ.

13 తుమ్తె కో కిచ్చొ జవున్ అల్లర్ సేడ అస్సె జలె, ప్రార్దన కెర్సు. తుమ్చితె కక్క సర్ల అస్సె గే, ప్రబుచి గవురుమ్ గాయుసు.

14 తుమ్చితె కక్క జొర్లొ గే జబ్బు గే అస్సె జలె, ప్రబుక నంపజలనచి సంగుమ్చ వెల్లెల మాన్సుల్క బుకార్లు, చి జేవ్, ప్రబుచి నావ్ తెన్, జా బాద తిలోసాచి తేల్ సువ, జోచి రిసా ప్రార్దన కెర్సు.

15 ప్రబుచి ఉప్పిరచి నముకుమ్ తిలి ప్రార్దన, జా బాద తిలోసాక రచ్చించుప కెరెదె, చి ప్రబు జోక చెంగిల్ కెరెదె. అన్నె, జో బాద సేడ్డిసి కిచ్చొ జవున్ జో కెర్లె పాపుమ్చి రిసాచి జలె, జా పాపుమ్ కి జోక చెమించుప జయెదె.

16 జాకయ్, తుమ్ కెర్లె పాపల్ ఎక్కిలోచి మొక్కె అన్నెక్లొ ఒప్పున, ఎక్కిలోచి రిసా అన్నెక్లొ ప్రార్దన కెర, తుమ్చ బాదల్ ప్రబు చెంగిల్ కెర్లె రితి, తుమ్క జో చెంగిల్ దెతి రితి. ప్రబుక సత్తిమ్ నిదానుమ్ తిలో మాన్సు ప్రార్దన కెర్లె, జా ప్రార్దన జలె కామ్ కెర్తయ్.

17 †వలీయా పూర్గుమ్చొ జలె, అమ్చొ రితొ మాములుమ్ మాన్సు, చి “పాని పెటున్ నాయ్” మెన జా సుట్టు ఎక్కి మెన్సు తెన్ ప్రార్దన కెర్లెకయ్, తిన్ని వెర్సుల్ సొప్పు జొన్నొ పూర్తి జా దేసిమి పాని పెటె నాయ్.

18 తెదొడి అన్నె ప్రార్దన కెర్లెన్, చి ఆగాసుమ్ తెంతొ పాని పెట్టి, చి ఈంజ బూలోకుమ్తె పలితుమ్ అన్నె దెర్లి.

19 బావుడ్లు, సత్తిమ్ ముల కో జలెకు పాపుమ్త ఉట్ట గెచ్చ తయెదె జలె, జోక కో సత్తిమ్ వాట్ అన్నె దెకవ ఆనుల గే,

20 జో కిచ్చొ జానున్ మెలె, జో పాపుమ్ కెర్లొసా పాపుమ్ వాటు అన్నె నే గెతి రితి జోక కో సత్తిమ్తె అన్నె కడ ఆనుల గే, మొర్నుతె జో మాన్సు నే గెతి రితి జోక రచ్చించుప కెర తమ్దె, చి జోచ ఒగ్గర్ పాపల్ చెమించుప జతి రితి అవ్కాసుమ్ దొర్కు కెర తయెదె.

† 5:17 5:17 రాసల్ మొదొల్ పుస్తకుమ్ 17:1, 18:41-45.

Kupia

Kupia: Kupia New Testament (New Testament)

copyright © 2018 Wycliffe Bible Translators, Inc.

Language: Kupia

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 6 May 2025

7ccb2690-4432-5e86-88c1-f8ee976f30f4